


社320
83



八旗通志初集卷之一百八十三
名臣列傳四十三

鑲藍旗漢軍世職大臣一

尚可喜



尚可喜字元吉。號震陽。漢軍鑲藍旗人。先世居山西洪洞縣。再遷至遼東海州。父曰學禮。仕明朝。以軍功任東江遊擊。戰歿於樓子山。可喜亦以軍功屢任至廣鹿島副將。時皮島總兵官毛文龍爲經畧袁崇煥所誅。副將沈世魁謀爲島帥不得。因誘島兵爲亂。遂囚新帥黃龍。奉世魁爲帥。可喜聞變。率兵入島。斬亂者。奉黃龍還帥府。世魁大恨之。已而黃龍戰沒。世魁竟以夤緣得島帥。島中將弁王廷瑞。袁安邦。孫奠邦等。希世魁意。誣告可喜罪。世魁卽檄調可喜至島。將

加害。可喜不知也。得檄卽發廣鹿。值海風大作。不得行。世魁檄愈急。可喜心疑。偵得其情。乃撫膺歎曰。吾家世捐軀殉國。媚嫉者反欲擠之死地。大丈夫安能俛首就戮乎。遂止不行。時天聰七年也。可喜素聞

太宗文皇帝寬仁神武。延攬英傑。遂決策來歸。先遣盧可用。金玉奎二人。赴

盛京納款。

太宗大悅。遣使賚貂裘示信。八年元旦。可喜舉兵略定廣鹿。大小長沙。石城。海洋五島。率所部將吏兵

民萬餘人。航海至紅嘴。時

太宗已遣文館范文程。固山額真陳丹木。率兵接應。三月至海州。

太宗命以從前旅順口所獲可喜親黨二十七人。俱給與完聚。又給與馬匹。田宅器用。無不備具。可喜遣盧可用奏言。蒙

天恩高厚。特賜乘騎。今已率三島官員兵民。於二月十七日。自洪水堡起行。二十六日已至海州。卽欲前往叩謝。因降衆未輯。以致遲延。又奏言。蒙

恩遣使賜歸。臣親眷二十七口。闔家周全。謹遣守備張

八旗通志 卷一百八十三
世祿叩闕謝

恩。四月丁丑。陞可喜爲總兵官。

賜麒麟鈕銀印。

太宗出御文館。可喜謝

恩畢。

賜坐於

御座左側。可喜攜來二副將叩拜。命坐於館外。設大

宴

賜之勅曰。朕惟任賢使能。崇功尚德。乃國家之大典。乘機邁會。達變通權。誠明哲之芳踪。爾副將尚可喜。原

係明臣。知明運之傾危。識時勢之向背。擒明副將二員。取廣鹿附近三島。殘破海防。實爲我助。又全攜兵民。盡載盔甲器械。乘危涉險。航海來歸。偉績豐功。超羣出類。誠可嘉尚。今陞爾爲總兵官。給以勅印。功名富貴。遠期奕世之休。帶礪山河。永無遺棄之義。凡有一切過犯。盡皆原宥。爾宜益勵忠勤。恪共乃職。勿負朕意。尚其欽哉。尋號其所統兵爲天助兵。八月。從

太宗征明。由宣府入邊。可喜遇敵兵三十騎於代州城

西門外。率七人擊敗之。獲馬二十四匹。又同烏真

超哈甲喇章京郎紹正。管燾戴都等。擊敗敵步

八旗通志 卷一百八十三
四
兵七百。斬首百餘級。閏八月。

賜銀一百兩。緞五疋。緞衣五襲。銀盃盤一副。又

賜銀二百兩。令其賞部下有功官員。天聰十年。改元崇

德。建

國號大清。大封諸王。晉封可喜爲智順王。冬。從征
朝鮮。降之。二年二月。奉

命率每牛象甲士四人。與孔有德耿仲明各率所屬全
軍。昇紅衣礮六十位。領朝鮮兵船五十隻。從英
親王阿濟格往攻皮島。三年四月克之。冬。十月
奉

命同昂邦章京石廷柱等。以神威將軍礮攻五臺。克之。
又以神威將軍礮攻戚家堡。石家堡。克之。獲人
三百十七名。

太宗特頒勅諭。賜貂皮銀馬。五年。隨大兵圍錦州。擊敗
明總兵曹變蛟。七年。錦州降。八年。從攻中後所。
前屯衛。竝有功。順治元年四月。隨睿王多爾袞
等。入山海關。破流賊。又追至慶都。敗之。斬其將
陳光先。谷大成。又同固山額真葉臣等。平定山
西。以紅衣礮攻克太原城。八月。從英親王阿濟
格。自西路出居庸。由宣府大同抵偏頭關。渡黃

河至綏德州。英親王屯兵米脂。可喜與固山額
真譚泰進攻延安。賊帥李錦據延安府城。固守
府城。與膚施縣城相爲犄角。分兵攻二十日不
下。可喜令諸將專攻膚施。而自勒精兵。猝薄延
安城。以大礮擊之。賊宵遁。遂克其城。時豫親王
多鐸由河南破潼關。克西安。李自成走商雒。二
年三月。

朝廷命豫親王多鐸往平江南。英親王阿濟格往平
湖廣。可喜遂隨英親王。由秦嶺出武關抵襄陽。
分兵兩路。英親王由左路。可喜與衍禧郡王羅

洛宏由右路。徇下鄖陽荆襄諸郡。降賊將王光
恩。苗時化等。至承天府。復與英親王合兵。追賊
至樊湖。獲其戰艦。降其衆數千人。自成勢窮。逃
之大冶。可喜與鰲拜巴哈納追及。擒賊將劉方
亮。軍師宋企郊等。自成竄入九公山。縊死。可喜
與英親王。遂東下九江。時故明南寧侯左良玉
子夢庚據九江。大兵至。卽率十五鎮兵迎降。乃
振旅還。

京。三年八月奉。

命偕恭順王孔有德等。進取湖南。聞賊兵圍桂陽州。可

喜與梅勒章京藍拜往援。賊聞風遁走。又聞流寇郝搖旗據道州。卽同藍拜等往剿。搖旗亦遁。湖南以次平定。時四年十二月也。五年正月。以平定湖南功。

賜黃金二百兩。二月兵次全州。將進征廣西。旋聞江西總兵金聲桓叛。遂還鎮武昌。

朝廷遣大兵征金聲桓。可喜亦遣人運大礮往助。八月聲桓平。可喜班師還

京。六年四月。廣東提督李成棟叛。殺總督佟養甲。

世祖章皇帝特頒金冊。改封可喜爲平南王。給三台鼉

鈕金印。其

冊文曰。茲爾尚可喜。原係漢臣。見明朝之氣運衰微。擒其所遣副將二員。起兵取廣鹿等五島。全攜所部將吏兵民。航海來歸。原給總兵官勅印。於崇德元年四月二十七日。優加冊印封智順王。俾功名富貴。帶礪山河。子孫世世承襲。一切過犯。盡皆原宥。後征大同時。爾於代州敗其步兵七百。平定朝鮮國時。爾率所部。隨輔政叔德豫親王破其救兵。和碩英親王取皮島時。爾率所部兵協攻。我兵在松山。閻衡山破洪軍門兵時。爾率所部兵交戰。又隨和碩英親王。在松山

八旗通志 卷一百八十三
破曹總兵之兵。攝政王取杏山時。爾率所部兵交戰。和碩鄭親王取中後所前屯衛時。爾率所部兵交戰。攝政王平定明朝天下。入山海關之日。殺敗流賊二十萬。爾率所部兵交戰。又追擊流賊至慶都縣。爾率所部兵交戰。和碩英親王征流賊圍攻延安府。爾率所部兵進戰。又同恭順王進取湖南。爾隨宜勦撫。攻克郡邑。處處殺賊。招撫官吏兵民甚衆。爾原係智順土。今授金冊金印。加封爲平南王。爾其益勵忠勤。奉公守義。以報特恩。尚其欽哉。勿負朕命。是年奉

命同耿仲明往征廣東叛逆提督李成棟。七月發天津。

十一月。仲明至江西吉安卒。其子繼茂襲封靖南王。領兵同往。七年十一月。可喜疏報克廣省城。斬賊六千餘級。溺水死者無算。陣擒賊將范承恩等。俘獲甚衆。肇慶府賊將宋裕昆等。率所部降。下兵部察敘。八年閏二月。可喜等奏報。總兵官許爾顯率官兵克復肇慶府。及羅定州。徐成功率官兵克復高州府。下兵部知之。八年十一月。可喜奏報。官兵恢復雷州府。九年十月。可喜同靖南王耿繼茂。奏報恢復情形。言臣於正月中整兵南下。沿途餘孽斂跡。僞總兵蔡奎歸

順。抵廉州。遣呂應學等攻克欽靈。陣擒僞總兵袁勝。僞南陽侯李元廕。僞鎮平伯周朝等。斬僞總兵上官星拱。僞益陽王等。惟賊渠李明忠遁走雷州。僞軍門杜永和。僞博興侯張月等。同僞西平王朱聿鏗。縛明忠來降。臣卽斬明忠以徇。計高雷廉瓊四府。前後投誠官。共二百八十一員。獲銀印關防等物甚多。

詔下所司。十年八月。可喜等奏報。官兵恢復化州及吳川縣。十一年十二月。與耿繼茂奏報。逆賊李定國圍犯新會。城中糧盡。殺人馬爲食。臣等率兵

往援。至三水縣。分布沿江隘口。出奇制其後。以待大軍。比靖南將軍朱瑪喇等至。遂統兵進剿。敗之於珊州。斬其副將一員。生擒十餘名。獲首一百五十餘級。旣抵新會。定國領馬步賊。分據山口山頭。我兵奮勇衝擊。奪其山。殺獲甚衆。定國遁去。新會以全。奏入。

命所司察敘。時亂後。百姓饑餓。道殣相望。可喜及耿繼茂捐銀買米賑恤。活民甚衆。事

聞。賜以銀幣。仍降勅獎諭。十二年二月。可喜同耿繼茂奏報。逆賊李定國自新會敗逃。臣等遣梅勒章

八旗通志 卷一百八十三
京畢力克圖等追賊兵至橫州。擊敗其步騎兵。勦殺甚衆。獲象二隻。定國渡牂牁江。遠遁南寧府。粵東高雷廉三府三州十八縣。及粵西橫州等十二州四縣悉平。下部察敘。十三年四月。可喜疏報。克復揭陽普寧澄海三縣。十三年五月。以擊敗僞安西王李定國功。加可喜歲俸一千兩。給

勅獎諭。仍賜貂裘鞍馬等物。

勅曰。朕惟折衝禦侮。社稷良臣。報德崇功。國家盛典。爾平南王尚可喜。英才自命。雄畧羣推。當我朝創業之

初。正航海投誠之日。加封崇爵。世職錫盟。畧地攻城。殊勲茂著。入關破寇。從定中原。秉鉞征南。丕昭弘濟。蓋忠勤之備至。亦威惠之交孚。乃因百粵跳梁。命爾底定。爾果能率所屬官兵。協力追勦。李定國竄伏遠遁。廣東疆土。遂爾全收。平肇慶。恢潮州。厥功茂矣。朕甚嘉焉。聿彰圖閣之猷。爰申詔祿之典。茲將功績。次敘入冊。又於藩俸六千兩外。加俸一千兩。以報勤勞。於戲。元老壯猷。忠尚資於善後。重臣宣力。誼更篤於開先。王其鞏固封疆。殫抒籌策。俾聲教全消瘴癘。而功名永重山河。尚克祇承。無斃朕命。欽哉。十五年四

月。可喜既加歲俸。因添注其軍功於

冊曰。後駐劄廣東。同靖南王統領官兵。圍困南雄府。有賊三千餘。突於西門衝出迎犯。擊敗之。用雲梯攻克南雄府。殺賊六千餘。擒獲偽總兵楊傑。董洪信。鄭國林等。斬之。安定南雄府百姓。又前往韶州府招撫官民。竝招撫韶屬六縣。俱各歸順。及抵省城。分派汛地圍住。發諭招撫不服。正困守間。有偽部院杜永和。遣偽侯伯張月。李云泰。李建捷等。率賊兵七千餘。竝廣西偽國公陳邦輔。龐太監。偽伯馬寶等。統賊兵萬餘迎犯。爾親督官兵敗之。擒獲偽副將魏廷相等八員。

竝招撫海寇梁標相等。獲船一百五十隻。又發官兵用紅衣礮攻打西門。城上礮火矢石交加。正難克間。爾親督官兵奮勇攻戰。遂克其城。殺賊六千有餘。百姓底定。行令所屬州縣。俱各投誠。又遣官兵招撫增城縣。有惠州府收養滿洲五人。轉送北京。又將所獲偽滋陽王等八人。當卽梟示。有海寇圍困潮州府。爾行諭漳鎮。發兵往援。賊方敗遁。又發官兵恢復肇慶。平定高雷廉等府。又前招撫海寇梁標相等。復行反叛。流毒地方。爾發官兵擊敗殺之。安定百姓。又廣西桂林告變。賊犯梧州。我兵進退兩難之際。爾密授方

畧恢復梧州。安定百姓。聞賊李定國圍困肇慶。隨同靖南王統領官兵前往肇慶。斬殺賊衆。又遣官兵追至四會河口。斬殺之。又賊將軍吳子聖率賊兵萬餘竝象隻圍困新會。浚濠豎柵挖窰。晝夜攻打。爾親率官兵前去援勦。有賊衆帶象隻前來迎戰。擊敗之。斬殺數百。遂解新會之圍。又同靖南王統領官兵前往高明進援。賊李定國遣衆來犯。爾遣官兵殺賊三百有餘。生擒僞總兵武君禧等三十餘員。竝獲馬騾器械等物。新會山峽口。擊李定國賊兵時。同靖南王。固山額真朱瑪喇。燾章京敦拜等。擊敗之。獲象一十三

隻。又撥官兵與燾章京敦拜等。尾追李定國。殺敗賊兵三千有餘。獲象一隻。又在橫州殺敗賊兵萬餘。各府州縣。俱經恢復。故以原俸又加俸一千兩。所有功績。添注册內。十七年九月。可喜疏報。僞將軍鄧耀入踞海康。官兵水陸夾擊。斬獲甚多。耀遁走交趾。僞黨梁信等就撫。巢穴平毀。下兵部知之。康熙元年正月。可喜疏報。逆賊蕭國隆。劫掠廣肇二府。臣分遣官兵水陸進勦。自順治十八年八月。至九月。平賊寨武定屯等一十三處。國隆窮迫。焚巢投水死。擒殺賊黨一千五百餘人。獲軍器

八旗通志 卷一百八十三
船馬無算。廣肇地方悉平。下部察敘。三年二月。可喜疏言。銅山諸逆鄭錦。周全斌等。各思歸誠。請以招撫事宜。專責饒平總兵吳六奇。相機料理。

詔從所請。是年碣石總兵蘇利叛。七月。可喜親統兵進勦。八月。戰於海豐。陣斬蘇利。四年八月。可喜疏報。蜚逆夥黨。竄據東涌海島。遊擊佟養謨等。調兵奮勦。生擒賊魁譚林高。殺賊一百五十三人。招撫男婦八十五名。又疏報。蜚戶黃明初等。駕船聯黨。在馬流門一帶。接濟蜚逆糧米。遣拖沙

喇哈番舒雲護等。領兵搜勦。擒斬賊黨四百三十餘名。俱下兵部知之。五年二月。敘可喜平廣東碣石衛逆賊蘇利功。增給俸銀一千兩。加

金册文曰。後駐劄廣東。同協鎮將軍沈永忠。總督盧崇峻。率領官兵。征討逆賊蘇利時。三次擊敗牛湖官田梅隴等。三寨阻犯之賊。斬賊千餘名。活擒賊僞守備桂吳仕。在南塘鋪地方。逆賊蘇利。率領萬餘賊迎犯。爾率官兵。將賊擊敗。克取賊巢碣石衛之城。斬賊首蘇利。併活擒僞總兵陳英。僞副將李慧。殺賊五千餘名。又遣官兵勦滅逆黨。於原俸外。再加一千兩。其功

增注入冊。七年七月。遣第九子之佐。第十子之廣。以廕生入監讀書。

特恩俱授爲散秩大臣。八月。同都統特晉查勘惠潮海邊。見內遷人民流離載道。再上疏請復界。蒙

特旨俞允。民慶更生。十年十一月。可喜以疾疏請其子尚之信。回粵暫管軍務。

詔從所請。十二年三月。

聖祖仁皇帝特遣一等待衛顧對等。至廣東傳宣

溫旨存問。賜貂帽龍袍黃帶。可喜具疏謝

恩。併疏請致仕。懇帶兩佐領爲護衛。歸老遼東舊居。三

月奉

旨。王自航海歸誠。克殫忠盡。戮力行間。平定地方。効力

累朝。功績茂著。綏輯粵東。鎮守巖疆。宣勞歲久。覽奏

年已七十。欲歸遼東耕種。情辭懇切。具見恭謹。能知

大體。朕心深爲嘉悅。今廣東已經底定。王下官兵。作

何搬移安插。著戶部兵部確議具奏。隨經部覆。令率

伊子及標下十五佐領。均行遷移。遣戶部尚書

梁清標等。入廣料理糧餉船夫。可喜已題報起

程日期。而是冬吳三桂據雲南反。十三年正月。

旨停止搬移。三月潮州總兵劉進忠叛。可喜令次子都統尚之孝率兵進剿。未幾聞耿精忠據福建反。於是廣西桂林駐防將軍孫延齡亦叛降三桂。偽檄有三藩竝變之語。可喜疏言。臣與耿精忠本係姻婭。今精忠反。不能不踣踏於中。但臣叨大恩。王爵年已七十有餘。雖至愚極陋。豈肯向逆賊求功名富貴乎。惟知捐軀矢志。極力保固嶺南。果能以表臣始終之誠。得

旨。王累朝勲舊。性篤忠貞。朕心久已洞悉。近復屢據猷畧。保固巖疆。厥功甚茂。覽奏披瀝。悃忱深為可嘉。著

益殫心料理。相機勦禦。以副朕倚任之意。旋

諭兵部。平南王尚可喜奏請調遣官兵。保固疆圉。忠誠顯著。深為可嘉。兩廣一應軍機調遣。及固守地方事宜。著尚可喜與總督金光祖同心合力。務酌萬全而行。可喜又奏言。臣眾子中。惟次子都統尚之孝。律已端慎。馭下寬厚。可繼臣職。至於軍機事宜。臣雖衰老。尚能指揮調度。斷不致有誤封疆。疏入。

命尚之孝襲平南王。是月。可喜又疏言。吳三桂遣賊兵二萬屯黃沙河。若與孫延齡合兵一處。勢益猖獗。請就近撥兵。會臣兵剿滅孫逆。

聖祖仁皇帝諭令副都統根特巴圖魯席布等。候將軍希爾根。哈爾哈齊等。兵至江西。卽率所部官兵急赴廣東。一切機宜。同平南王尚可喜參酌以行。尋授根特巴圖魯爲平寇將軍。可喜又疏請。調發官兵征勦逆賊。及長江宜設舟師。備禦海寇。五月。可喜疏報。孫延齡叛。自稱安遠大將軍。移牒平樂梧州諸府。伏候廟謨指授。協力蕩勦。

聖祖命尚可喜與總督金光祖。提督馬雄等。會同商酌。逆賊孫延齡。有可勦之勢。卽議進勦。若未可速進。則俟大兵協力剪滅。又

命部臣傳諭馬雄。固守所屬。相機滅賊。倘賊盛難禦。卽率官兵赴廣東。與平南王總督等協守。以俟大兵之至。七月。廣東巡撫劉秉權疏言。平南王次子都統尚之孝。辭襲王爵。今當諸逆鴟張。大兵進勦之時。平南王尚可喜籌畫周詳。精神強健。應令尚可喜照舊管事。俟事平。令尚之孝承襲。如其請。可喜疏報。逆鎮劉進忠。遣逆黨陳奠。率衆分據程鄉縣水陸要口。抗拒我師。臣遣提督嚴自明等。分遣官兵擊之。斬獲甚衆。程鄉縣僞守備張奉寰。遣人通款。縛獻僞守備楊滄。開門迎降。又疏

報官兵恢復程鄉縣。後鎮平平遠二縣。文武各官俱赴軍前投繳偽印偽劄。恢復二縣。俱下部議敘。八月。可喜疏報。潮州叛鎮劉進忠之黨劉斌。據普寧。臣遣子都統尚之孝等。遣發官兵進剿。被陷知縣段藻。潛遣人通款。誘賊出城迎戰。因閉門拒之。我兵勦殺甚衆。恢復普寧縣城。九月。可喜疏報。臣遣子副都統尚之節等。統率官兵。自程鄉縣間道至閩。勦賊不煩兵戈。逆賊望風逃遁。偽官弁繳劄投誠。恢復大埔縣。直抵三河壩。俱奉

聖旨嘉獎。下部議敘。十三年九月辛未。平南王尚可喜

疏報。逆賊劉進忠。抗不受撫。當官兵在途。則據險抗阻。迨官兵甫抵潮城。則窺劄營甫定。輒鼓衆出犯。幸官兵嚴整以待。在新亨地方。勦殺偽副將陳璉等。及賊兵六百六十餘人。生擒二十七人。又在城外接戰。斬賊二百二十五人。又七月十五日。賊衆五千乘風雨衝突。官兵奮擊。斬賊八百二十人。生擒八十八人。前後所獲盛甲器械。不可勝數。亦下部議敘。可喜又疏言。續順公沈瑞。身陷賊中。不甘從逆。屢遣人通言。請兵

八旗通志 卷一百八十三
拯救。臣因遣官兵赴閩接應。今已迎回粵東。得旨。續順公沈瑞不甘從逆。挈家回粵。情屬可憫。令復還原爵。仍管伊標官兵。駐劄廣東。十月。

聖祖特諭議政王大臣等。自吳三桂叛逆以來。平南王尚可喜爲國抒忠。厥功茂著。當茲粵東軍興之際。督撫提鎮以下。俱聽王節制。嗣後補授文武官員。聽王選補奏聞。其一切調遣兵馬。及招撫事宜。亦聽王酌行。是月。可喜疏言。逆賊劉進忠盤踞潮州。敢於負固者。恃海賊爲應援也。今海賊直薄東城。而劉逆屢出城中賊兵來犯我師。總兵官王國棟等。統

官兵三戰三捷。斬獲甚多。下部議敘。十一月。可喜疏報。吳逆告變以來。廣東廣西奸徒。聞風四起。廣州民陳士奇。密首奸民江鵬翥等。在佛山鎮地方。結黨煽亂。隨征官金光。偕陳士奇設計擒之。審實正法。疏入。

命給金光鴻臚寺卿銜。陳士奇以知縣卽用。可喜又疏言。續順公沈瑞。副都統鄧廣明。及官兵家口二千餘人。爲叛鎮劉進忠驅入福建。拘留漳浦。恐大兵進剿。玉石難分。得

旨。續順公沈瑞家口。被賊拘留。殊爲可憫。此係有功之

人。理應保護。王等進勦恢復之日。留意察訪。保護得所。可喜。又疏報。副都統尚之節等。進兵潮州府。攻勦逆賊劉進忠。克東津筆架山。洗馬橋等處地方。巡撫劉秉權。署總兵官王國棟等。攻破城南鳳凰洲木城二座。斬僞督金漢臣等。殺賊五千餘級。又副將何九衢等。率兵恢復潮州澄海縣。得旨嘉獎。下部議敘。十二月。可喜疏言。臣年老衰病。請速發滿洲大兵。彈壓全粵。

聖祖乃命將軍尼雅翰。率所部兵。同副都統綽可托。速赴平南王軍前。協守粵東。十四年正月。可喜疏報。賊首黎化中。陳九鼎等。糾合楚逆李漢英。聚眾萬餘。直犯連州。經我兵擊敗逃遁。仍復嘯聚大田頭。蔗塘。清水等處。以爲巢穴。臣遣遊擊李有才等。率領官兵進勦。焚搗巢穴。擒斬甚多。賊已遁入楚界。下部議敘。是月。

聖祖特諭吏禮兵三部。平南王尚可喜航海歸誠。勲猷茂著。

太宗文皇帝嘉其勞績。特賜王封。及定鼎燕京。復能殫竭忠忱。贊襄大業。

世祖章皇帝知其夙篤忠貞。畀以巖疆重任。鎮守粵東。

海氛寧靖。百姓乂安。近因吳三桂耿精忠叛逆。該藩益勵忠純。克抒偉畧。悉心籌畫。數建膚功。朕甚嘉焉。事平優敘。屢有諭旨。前奏年老任重。請以其子尚之孝承襲王爵。已允所請。今思該藩累朝勲舊。功著封疆。宜錫殊榮。以酬茂績。平南王尚可喜。著進封平南親王。卽令其子尚之孝襲封。尚可喜以親王品級頂帶支俸。示朕優眷之意。廣東文武事務。著尚可喜照舊料理。其親王之寶。亦暫行掌管。尚之孝統兵在潮。着給與大將軍印。應行封典。爾部卽遵諭行。尋加之孝爲平南大將軍。閏五月。可喜疏報。近因饒平

失守。逆賊朱纘率黨來屯湖寮。廖曇率黨來屯白垓。劫擄村寨。臣遣子平南大將軍尚之孝同提督嚴自明遣發官兵於大埔縣地方擊敗逆賊陣斬僞叅將生擒僞遊擊等。又連陽遊擊吳標連州知州李蕢於連州大鑊古樓山小水坪石馬坪等處兩次擊賊李化龍沈九珠等。又廣州屬之龍門增城從化與惠州屬之博羅河源長寧等縣內。公庄路溪鉄崗馬鞍陳禾崗諸處向爲土賊淵藪。恣行剽劫。今突犯龍門。臣遣發副將盧光明等帶領官兵於龍門等處擒斬賊

衆八百餘。招撫千餘。救回被賊擄去良民。又疏報虎門副將李印香等領兵於碣石白沙湖等處。擊敗賊衆。燒燬賊船百餘隻。俱下部議敘。時可喜子平南大將軍尚之孝統師圍潮州。劉進忠屢戰屢敗。愴惶失措。求救於海寇鄭錦。錦遣偽伯劉國軒。趙得勝。偽總兵何佑。率衆萬餘赴救。我師衆寡不敵。退至普寧。六月。高州總兵祖澤清叛。招引馬雄。董重民。李廷棟。王洪勳。郭義六偽將軍。率賊數萬。攻陷雷廉德慶。開建電白諸郡縣。官兵屢戰失利。賊兵直抵新會潮州。賊

劉進忠。劉國軒等。於十二月除夕。率賊衆攻破普寧大營。直追至惠州博羅。可喜以封疆重大。寇逆猖狂。身病難以臥理。屢疏哀請。求遣親王大臣。統大兵入廣彈壓。

聖祖念可喜年老時艱。情詞諄懇。十五年二月。遣其第

七子和碩額駙之隆。赴廣贊理軍務。至江西路阻。不能達。兩粵東西交訌。可喜藩下總兵班際盛。孫楷宗。水師副將趙天元。趙有儀等。亦叛。人情洶洶。罔有固志。可喜年老。不勝憂憤。十月。病遂加篤。昏迷之際。張目強視曰。吾受

八旗通志 卷二百八十三
三朝隆恩。時勢至此。不能殺賊。死有餘辜。隨令衆子奉所

賜冠服服之。扶掖北向叩首訖。顧謂衆子曰。吾死後。必返殯海城。魂魄有知。仍事

先帝。言畢而薨。年七十有三。

聖祖聞之。震悼。特遣國子監祭酒宜昌阿。禮部郎中范承勳等赴粵。

諭祭二壇。賜諡曰敬。二十年五月。子之孝等往迎其喪。北歸至德州。

聖祖遣一等侍衛額爾吉圖等往奠酒。又遣內大臣伯

心裕等往奠酒。八月至天津。

特遣禮部尚書吳正治。侍郎傅洪基。

諭祭二次。喪至丁字沽。

聖祖又降旨云。王功蓋天下。人所共知。忠心爲國。晝夜靡寧。若天下臣子。俱能如王。天下不致變亂。聞王柩到丁字沽。朕不勝悲慟。特遣內大臣他達等。前往奠酒。是年冬。葬海城。

賜葬銀八千兩。立碑墓道。又

賜守墓閑散佐領二員。皆異數也。二十一年春。

聖祖駕幸奉天。遣一等公頗爾益往墓奠酒。哀榮之典。

他人莫及焉。

八旗通志初集卷之一百八十四
名臣列傳四十四
鑲藍旗漢軍世職大臣二
李繼學 墨爾根轄 子桑額
海爾圖 張存仁 弟之子張瑞午 孫張璣
巴泰 弟巴喀 劉光弼
段應舉 高鳴鐘 子高永運

八旗通志初集卷之一百八十四

名臣列傳四十四

鑲藍旗漢軍世職大臣二

李繼學

墨爾根轄 子桑額

海爾圖

張存仁 弟之子張瑞午 孫張璣

巴泰 弟巴喀

劉光弼

段應舉

高鳴鐘 子高永運

李繼學。漢軍鑲藍旗人。原係清河商人。天命六年。克遼東。後來歸。以辦事勤勞。授都司。復以考查錢糧。剔清隱匿。並擒獲間諜。追殺逃人有功。授三等副將世職。以年老致仕。

墨爾根轄。李繼學子也。原名李國翰。生而明敏。勇銳過人。初襲父三等副將世職。

賜名墨爾根轄。我師初征明北京。步擊愛塔兵。敗之。天聰二年。圍錦州。我左翼兵進擊明錦州兵。墨爾根轄率本固山兵奮擊敗之。隨固山額真石廷柱取糧。以餉我錦州大兵。因以紅衣礮擊降臺。

堡五座。並擊敗松山杏山馬步兵。又隨四固山克臺十八座。五年。取大凌河。城內兵突出來戰。墨爾根轄擊敗之。又敗明監軍道張春兵。旋往掠錦州。攻降于子章臺。九年。考察所管人丁。以墨爾根轄善於撫循。較原數增至二百四十三人。加世職爲二等昂邦章京。崇德三年七月。更定部院官制。擢墨爾根轄爲理事官。八月。隨揚威大將軍多羅貝勒岳託等。征明北京。至山東時。於邊外五處發埋伏火藥。入邊日。明吳軍門兵約千餘陣於山巔。墨爾根轄同恭順王孔有

德懷順王耿仲明。併科爾沁兵。越衆先入。直上山巔。擊敗之。獲馬四十匹。進攻牆子嶺。同恭順王部下梅勒章京郝成功。懷順王部下梅勒章京曾傳孔。以紅衣礮克其城。遇明軍門盧象昇兵。同郝成功。曾傳孔。移紅衣礮向敵營攻擊。隨同滿洲大兵殺入。敗之。至濟南府。同郝成功。曾傳孔。用紅衣礮擊壞城樓。遂克其城。師還。經直隸地方。同鑲紅旗兵。用紅衣礮攻慶都。獲鹿二城。壞其堞。四年六月。陞梅勒章京。五年。圍錦州。督放本固山紅衣礮。攻克呂洪山臺。六年。圍錦

州同固山額真巴顏擊敗山口步兵。明軍門洪承疇兵自松山城遁入高橋迤南三臺。旋隨四固山往攻。克之。生擒臺內副將王希賢。叅將崔定國。都司楊重鎮。斬守備一員。都司一員。并兵一百十人。遍野搜剿三日。總兵吳三桂。王樸。奔入杏山。尋攻松山南山臺。克之。並克塔山附近臺。又同固山額真巴顏克塔山城。隨同四固山兵趨杏山。克附近諸臺。並拔其城。七年六月。改烏真超哈四旗爲八旗。墨爾根轄陞鑲藍旗固山額真。八月叙功。加世職爲一等梅勒章京。兼

半個前程。八年。隨鄭親王濟爾哈朗取前屯衛中後所二城。指揮本固山紅衣礮攻城有功。順治元年嘉其績。加世職爲三等昂邦章京。五月。紅西口賊作亂。同固山額真劉之源統兵往剿。滅之。六月。同固山額真葉臣統兵平定山西。至定州。聞饒陽縣爲流賊掃地王所據。卽同固山額真祖澤潤率每牛朶下甲士一人前往。土賊步兵約三千餘來戰。擊却之。賊於村中挖壕駐營。復同祖澤潤督兵擊敗之。並以紅衣礮克其臺。擒獲掃地王斬之。至饒陽縣。敗土賊五萬餘。

八旗通志 卷一百八十四
四
孽復盤踞靈地山寨。率兵往困。敗其來援兵二千。招撫山寨三座。進至山西太原府。環視攻擊之處。城內兵乘隙突犯。力戰却之。隨指揮紅衣礮攻克其城。本地土賊與流賊合兵三千。來犯汾西縣。率兵往援。敗其衆。又同衆固山額真分路招撫。凡得七府二十四州一百三十五縣。以功

賜銀五百兩。又同固山額真圖賴往視黃河渡口。賊於河岸立柵駐立。墨爾根轄率兵直入。毀其柵。敗其後營賊兵。有賊帥毛總兵者。率兵四千餘來

攻應山縣。墨爾根轄同巴顏祖澤潤劉之源等督兵奮擊。破其軍。又有賊帥馬總兵。駕船六百隻。已降復叛。卽同劉之源金礪等。追至武昌府。獲船六十二隻。又同劉之源追獲常副將兵船一百七十隻。明將左良玉所屬兵。駕船七百隻。殺傷我兵以遁。墨爾根轄同劉之源截取之。二年十一月。

世祖章皇帝命墨爾根轄同巴顏率領官兵往陝西。會同定西大將軍內大臣何洛會等。征剿四川。三年正月。逆賊賀珍孫可法胡向化等。率馬步賊

兵七萬餘來犯西安。適墨爾根轄同巴顏領兵
 方至。隨會同何洛會兵。內外夾擊。殲滅殆盡。獲
 駝馬甚多。其圍乃解。二月。同昂邦章京齊禮克
 圖領兵護送奏疏。遣王副將率兵百名前行。至
 渭南縣界。遇王秀才兵千餘人。擊敗之。又遣中
 軍陳德副將任珍等。以兵七百破賊首李文炳
 於蒲城縣。生擒賊將王文。張留。俘獲無算。遂趨
 同州。敗賊首李遙。殲賊二百餘名。四月。叙功。加
 授二等昂邦章京世職。尋同巴顏率烏真超哈
 兵。並副將王平等撲滅延安一帶諸寇。大敗賊

衆。尾至張果老崖。賊入山寨。挖壕困之。七月十
 六日夜潛攻。克其寨。擒斬賊渠康千總。獲馬羸
 二百九十三匹。靖遠大將軍肅親王豪格以其
 捷

聞。遂隨王進征四川。遇流賊霍總兵步兵二千餘來
 戰。同燾章京車爾布擊敗之。又同尚書譚拜乘
 船渡河。敗賊袁韜馬步兵於涪河對岸。五年四
 月。

世祖特授墨爾根轄為定西將軍。率右翼烏真超哈官
 兵駐防漢中。尋吳三桂亦自錦州移鎮焉。六月

叙功。加至一等精奇尼哈番。六年二月。偽王朱森奎。偽定遠侯趙榮貴。率眾萬餘來犯階州。墨爾根轄同吳三桂等。前後分擊。殺七千餘人。陣斬森奎。榮貴。獲偽侯印一顆。偽總兵印十顆。及羸馬金銀等物無算。三月。復宜君。同官二縣。擊敗逆賊王有強等。斬首七千餘級。獲駝馬四千五百餘匹。四月。克蒲城縣。誅逆賊王永強所設偽官。秦隴悉平。巡撫黃爾性以聞。

世祖特降諭。王等忠勇智畧。與將士同心擊賊。擒獲偽

官。大獲全勝。深可嘉悅。其益勵壯猷。務獲渠魁。以定疆圉。王與固山額真。今後但發縱指示。不必身先士卒可也。五月。墨爾根轄等統兵進取延安府。賊兵聞風遠竄。遂復其城。七月。恢復延綏鎮城。殲賊四千六百餘級。八月。統兵攻勦宜川。安塞。清澗等處逆寇。斬級數千。連敗賊眾。十二月。遣官齎疏奏報。賊渠劉登樓。任一貴。謝汝德。潰奔榆鎮。西協定邊一帶。臣等隨發兵進勦。累戰克捷。偽將齊進才。殺汝德降。將官馬永爵射死。一貴。總兵官劉芳名。擒斬登樓。榆林等處俱已底定。臣等

隨分兵渡河。攻圍保德府谷。又發諭招撫河東附近。悉皆納款。河東營僞總兵張鳳翼授首。偏關僞軍門萬鍊。內變自焚。奏入。章下所司。七年八月遇。

恩詔。准世襲罔替。十一月。墨爾根轄遣發官兵恢復府谷縣。斬僞經畧高有才等。及僞官三百餘員。兵一千餘名。擒獲僞榆林道孫士寧。副將賈梧。遊擊季鼎鉉。斬之。招降僞總兵郝自法等。捷至下。兵部察敘。八年十月。

世祖命墨爾根轄統領烏真超哈及漢兵。副吳三桂。由陝西進征四川。九年正月。二次遇。

恩詔。由世職加封一等伯。尋至四川。征逆賊平四。大敗之。生擒僞總兵二員。副將五員。獲駝馬甚多。賊退據葭州。復領兵前往。三面齊攻。下其城。斬僞總兵王叟。王立之。并賊兵三千餘人。獲馬騾八百有奇。七月。遣發官兵招撫漳臘松潘等處。攻拔重慶等府。勦殺僞總兵劉廷明等。俘獲無算。又分遣梅勒章京代都等。領官兵圍成都。僞撫南王劉文秀舉城降。遂進攻嘉定州。擒斬僞總兵龍名揚。蜀疆漸次底定。隨齎疏奏言。蜀地東

接三楚。西連羌番。南通滇黔。北抵秦隴。幅幘甚廣。易亂難治。自張逆蹂躪。諸僞相繼。十數年番裸跳梁。子遺塗炭。仰荷

天恩。軫念殘疆。大張撻伐。雖巨寇三路奔潰。東南漸入版圖。然大憖孫可望。假借名號。鼓煽人心。蟻聚建昌。遵義。永寧等處。抗拒王師。未嘗忘情於蜀。宜定經制。擇衝要地。設鎮將官兵。以爲久安長治之計。疏入。下兵部議。是月。

世祖諭平西王吳三桂。固山額真墨爾根轄曰。前六月二十八日。有諭王及固山額真墨爾根轄。今相機進兵貴州。如四川或有渠魁抗持。不便移師前進。仍著速行馳奏之旨。今和碩敬謹親王。充定遠大將軍。統大兵於本年七月二十日出都。王不時差官遠哨。酌量王師由湖南將進貴州之時。王卽由四川進剿。毋得於大兵未到之先。輕行深入。如四川賊未盡平。兵難前進。亦卽以實奏聞。八月又

諭曰。前曾諭爾等。俟大兵入貴州時。爾等亦相機而往。今大兵已止貴州之行。爾等亦不必往。可遵前諭。相機安定四川地方。十月。墨爾根轄同三桂齎疏報捷。奏言。巨憖孫可望。遣僞將軍王復臣等。率馬步

八旗通志 卷二百八十四
兵五萬。入犯川南。臣等退處保寧。爲決戰固守之計。值賊黨薄城下。連營十五里。我兵奮勇橫衝。賊衆大潰。擒斬復臣及僞將等二百餘員。賊兵四萬餘級。獲僞印象馬器械無算。下兵部議叙。十一月。

世祖諭曰。覽平西王固山額真墨爾根轄捷奏。朕心嘉悅。特頒內庫內監衣帽馬匹等。大賚行間將士。賞墨爾根轄貂帽一頂。貂袍一襲。靴一雙。鍍金玲瓏鞋帶一束。鍍金玲瓏腰刀一口。鍍金盔甲一頂。副。鍍金玲瓏撒袋一副。玲瓏鞍一副。馬一匹。其

餘賞給有差。十年閏六月。叙破王永強。劉文秀等賊軍功。晉封墨爾根轄爲三等侯。十四年

世祖勅諭平西王吳三桂。固山額真侯墨爾根轄。逆賊煽亂雲貴。騷擾地方已久。今賊李定國與孫可望互相爭戰。可望來降。乘此賊黨內亂。人心未定之際。特命王爲平西大將軍。同固山額真侯墨爾根轄統兵進討。爾等統所屬官兵。及漢中四川各官兵。由四川前往貴州。相機進取。受茲重任。宜殫竭心力。蚤奏膚功。欽哉。十五年四月。墨爾根轄等遣發官兵。敗賊於合州。斬殺甚多。遂進取重慶。僞都督杜于香率

衆逃竄。合城克復。六月。墨爾根轄等自收服重慶。遂統兵進發。逆首李定國。遣僞將軍李正國等。率賊衆象隻。在三坡紅關等處。據險設伏。以拒我兵。墨爾根轄等。令馬步相兼。步步爲戰。節制王節前進。賊遂奔潰。我兵疾追。賊由水西遁入雲南。遂收服遵義府。並所屬州縣。招撫僞總兵及副叅遊等官。計降賊兵五千有餘。獲其象馬器械。遂克開州捷。

聞得。

旨嘉獎。命所司於事平日議叙。又遣人招撫四川邊境土司等官。烏斯藏國大乘法王。大寶法王等。七月癸亥卒於軍。十七年。喪至

京師。

世祖遣內大臣致奠。四月。

予祭葬。諡敏壯。六月。追贈太子太保。雍正十二年。特建賢良祠。祀

國家有功之臣。墨爾根轄入祠祀焉。長子海爾圖。自有傳。第二子李世盛。仕至一等護衛。第四子諾邁。見諡法名臣傳。第五子李世昌。仕至雲南布政使。第六子諾穆圖。見諡法名臣傳。第三子

八旗通志 卷一百八十四
桑額。初任鄭親王護衛。尋陞叅領。康熙三年。擢陝西寧夏總兵官。十三年。陞雲南提督。值逆藩吳三桂叛。改補湖廣提督。協統兵馬進剿。三月。同大兵進取岳州。七月。克取七里山。十五年。議敘軍功。加右都督銜。十七年。入洞庭會剿逆賊。敗之於君山。乘勝追至岳陽樓前。燒燬賊船百餘艘。十八年。隨貝子章泰。率領滿漢官兵。恢復華容。石首二縣。又遣守備吳榮進取安鄉縣。賊衆悉遁。湖南平。遂仍改爲雲南提督。六月。疏請新任湖廣提督暫駐彝陵。請以彝陵官兵隸其

標下。湖廣提標官兵。姑屬臣統領。奉

聖祖仁皇帝諭。桑額隨大兵進取雲貴。其湖廣提督標兵。准入雲南標下。俟底定之日。仍回楚中。彝陵鎮標官兵。准隸湖廣提督。至於隨桑額前往官兵。方事剿賊收疆。標下官員。可加銜一等。兵卒。可動正項錢糧賞賚。以示鼓勵。遂進取辰龍關。隨貝子章泰。用奇兵九股。斬賊數千級。拔其關。十九年。遣援剿左路總兵官陳珀等。自貴陽進剿。十一月初十日。大敗賊於永寧州。復其城。追至鷄公背鐵索橋。賊焚橋遠遁。隨大兵進征。薄雲南城下。復同都統

八旗通志 卷一百八十四
希福往勦楚雄逆寇馬寶。追至烏木山。賊據山以拒我兵。奮擊大敗之。擒斬甚衆。馬寶越山而遁。僅以身免。又追勦逆賊胡國柱等。至雲龍州之青里屋。國柱度不能脫。遂自縊死。僞帥王敘。李匡皆自焚死。僞將軍王良等率衆降。雲南平。駐劄大理府。二十五年卒於任。

海爾圖。墨爾根轄子。順治三年。隨官兵添駐西安府。敗賊何甄兵。並擊敗賊渠孫守法。遂解西安圍。又賊二隻虎兵來戰。擊敗之。尋由陝西進征四川。擊敗賊袁韜兵。五年四月。任甲喇章京。

七年六月。陞梅勒章京。九年二次

恩詔。授拜他喇布勒哈番。十一年三月。任戶部右侍郎。

六月。隨靖南將軍朱瑪喇征廣東。敗僞安西王李定國步兵四萬於新會山峪內。恢復三府三州十八縣。並廣西省二州四縣。在事有功。加世職爲三等阿達哈哈番。十二年。轉左侍郎。十三年。坐事革侍郎。降世職爲拜他喇布勒哈番。十六年。陞本旗固山額真。康熙元年。承襲父墨爾根轄三等侯。十三年。以出征陝西。卒於軍。

予祭葬如典禮。

張存仁。漢軍鑲藍旗人。原係明朝寧遠副將。天聰五年十月。同明總兵祖大壽。從大凌河投誠。即授一等副將世職。六年三月。

太宗文皇帝賜緞疋銀兩器皿等物。七年十二月。

賜鑲貂朝衣二襲。八年二月。

賜男婦四十口。牛十二頭。崇德元年。以大凌河歸附各

官為部院承政。擢存仁為都察院承政。六月。

賜存仁世襲勅書。授一等副將世職。准襲八次。三年七

月。更定部院官制。改存仁為都察院右叅政。五

年四月。疏陳攻取錦州之策。言臣覩圍困錦州

之計。寔出萬全。但慮出掠之利。馬到即收。圍困之功。積日始建。官軍不見目前之計。必生苦難懈怠之心。願

聖主振作軍心。堅持困守之策。截彼偵探。禁我逃亡。遠

不過一歲。近不過一月。自有可乘之機。兵法全

城為上。蓋貴得人得地。不貴得空城之意也。昔

元太祖剪滅人國。勞數十餘年之力。及取中原。

又欲屠近河人民。隙地牧馬。賴耶律楚材畫財

賦之策。而太祖勉從。太祖身在之日。雖大業未

成。而世祖一統之基。實賴耶律楚材一語留之。

由是以觀。欲成大業者。非人地兼得。未易爲也。人地兼得之術。莫過攻心。今我兵大勢壓境。彼必議棄錦歸寧。再急。必議棄寧歸關。祖帥跋扈。畏罪。豈肯輕離窠穴。事若緩。則慮持久。事若急。則慮身家。祖帥背恩失信。人多以爲無顏再降。臣確知彼心。惟便是圖。本無定見。一當危急。諸所不顧。况伊素所恃者蒙古耳。數年以來。蒙古多慕

聖化來歸。彼必疑而防之。防之嚴則思離。離則思變。伏願以屯種爲本。時率精銳直抵錦城。布散文書。

於蒙古。以爲搖撼之計。再多擒土人兵卒。廣施招撫。言之透徹。心自變更。心一動。則未有不降者。此攻心之策。得人得地之術也。大凌河之降。松山之抗。非往事之明效大驗耶。古帝王傳檄而定天下。莫不洞悉於此。十二月。再言兵家之事。有時有形有勢。三者變化無定。婉轉而用之者。在於人心。我兵始困義州。又困錦州。至卽當避。猶奮螳臂而當車轍。乃思慮之所不及也。雖然。非彼之能抗我。乃我兵圍困不嚴。所以偷運糧料。然亦籠中之物也。臣思

聖主智勇兼全。新春大兵必吞錦州。或挖壕。或礮擊。不克不止。臣料城之得也。必其內蒙古有變。中自潰亂。倘無此事。則城之得也。亦無定期。若欲久困。必繞城以築臺。兵圍數匝。或者始能得之。松山杏山塔山。乃錦州之羽翼。寧遠之咽喉。此三城不破。寧遠之肝膽不喪。三城之中。惟塔山可取。其城在西山之下。若從山上以礮擊之。其室屋自壞。不多費力而城可得。城一得。則錦州之羽翼折。而寧遠之咽喉塞。兵法云。困堅城者必留其隙。今錦州雖不甚堅固。亦當留山海關以

爲之隙。况城內遼兵少而西兵多。一人帶箭入城。滿城驚惶。各起遁走之心。必不戀戰。善用兵者。巧於留隙。則山海可得。若據守山海。則關外諸城自然離散。故務取山海者。實入內之要策。困之不必多用蒙古兵。其兵雖多。法度不嚴。萬一不如意。一動不如一靜。臣先言修廣寧而守之者。因與白土廠相近。實爲國家闢土地。立城池。漸次前進之計。今大兵住義州。超出尋常。已爲望外之事。故冒昧上陳。臣聞烏真超哈先行兵時。各帶子弟甚多。今換班之際。自身不去。令

家人代去。臨陣不力。久住必逃。此換班之大弊。故並奏之。得

旨。命察兵丁本身不去。家人替代者。六年大破明援兵於錦。十月存仁疏請宜相機度勢。速行攻取。章

太宗是之。七年既克錦州。四月復進疏言。今松錦既破。明國重托之督臣洪承疇。寧錦倚賴之鎮臣祖大壽。已爲我

聖主擒矣。竊思洪承疇欣欣自得。歡然倖生。是能審天時。達世務。仰慕

聖上爲有福真主。祖總兵悔盟背約。仍覩面來歸。是勢窮力竭。見松山已下。援兵盡沒。意欲蹈大凌河之漏網。未可知也。洪承疇既倖得生。必思見用我國。則不宜久加拘禁。令其剃頭居官。祖大壽係我國寇讐。待以不殺足矣。在前途尙有可攻之地。可克之城。不可堅明人後來抗守之意。况吳總兵觀望於前。焉知不蹈前轍乎。宜頒

御劄於寧遠城中鎮將等官。說明松錦生殺之理。投順者必生。抗逆者必殺。一一詳示。定功陳害。吳總兵有不搖動其心者乎。

太宗旋頒御劄諭吳三桂及鎮守寧遠諸明將存仁亦
遵

太宗命遺三桂書勸令速降。六月編烏真超哈四旗爲
八旗。擢存仁爲鑲藍旗梅勒章京。八年隨鄭親
王濟爾哈朗攻取前屯衛中後所二城。督放本
旗紅衣礮克之。順治元年二月敘功。加半個前
程世職。是年同固山額真葉臣招撫山西六府
二十四州。一百三十一縣。攻太原府省城。指揮
本旗紅衣礮拔其城。又隨豫親王多鐸平定江
南河南等處。俱督放本旗紅衣礮有功。二年隨

貝勒博洛等往征浙江。遂暫管浙江總督。先是
江鎮兵竄。民苦剽掠。城中逃避幾空。存仁集諭
紳衿。開導撫綏。民心帖然。七月奏言。近有借剃
頭反順爲逆者。若俟反形旣露。必處處勞大兵
勦捕。竊思不勞兵之法。莫若速遣提學開科取
士。則讀書者有出仕之望。而從反之念自息。行
蠲免。薄稅歛。則力農者少錢糧之苦。而隨逆之
心自消。奉

世祖章皇帝旨。開科以取士。薄歛以勸農。誠安民急務。
歸順各省。准照恩詔事例。一體遵行。是月引年乞休。

不允。九月。僞國公方國安等。從富陽渡江來犯杭城。存仁遣副將張杰。王定國督兵往剿。斬首四千餘級。餘賊復盤踞富陽。又遣定國往餘杭防剿。至關頭遇賊對壘。我師奮勇掩擊。追至小嶺二十餘里。斬獲無算。陣擒國安子士衍。斬之。十月。僞大學士馬士英等。兵渡錢塘。至杭城十里。立五營。平南大將軍貝勒勒克德渾遣兵進剿。未至。賊聞風渡江遁去。存仁同總兵田雄追斬五百餘級。十一月。陞兵部右侍郎兼都察院右副都御史。總督浙江福建軍務兼理糧餉。是

月。馬士英。方國安。渡錢塘窺杭城。存仁同防守。梅勒章京季什哈。總兵官田雄等。率兵擊敗之。溺江死者無算。十三月。遣官齎疏報捷。言逆賊馬士英。方國安。嘯聚山東赭山。杭州朱橋范村等處。所在肆掠。梅勒章京朱瑪喇。總兵官田雄。副將張杰等。分兵進剿。方逆水師數萬。一鼓盡殲。其餘諸寇。被官兵擒斬者甚衆。三年二月。昌化縣賊首姚志卓嘯聚亡命。攻陷縣城。與江東叛寇方國安相結。存仁遣張杰等領兵追剿。志卓遁去。昌邑復平。四月。疏報。擒獲逆賊陳萬良。

等。五月。敘破流賊。及平定河南江南等處軍功。加世職爲三等昂邦章京。六月。遣副將張國勲等。勦滅太湖逆賊。擒獲僞大學士馬士英等。斬之。八月。再疏求罷。不允。十一月。存仁疏請錢塘一帶緊要地方。議設水師五千。以防海寇。下所司知之。四年五月。海寇周雀芝。據福州鎮東衛。並海口民城。存仁遣副將滿進忠等。分兵攻擊。兩城俱下。又賊黨岑本高犯浦城。遣副將李繡敗之。十一月。復引疾請代。

世祖慰留之。十二月。遣副將馬成龍等往勦處州。大敗

賊衆。恢復景寧雲和龍泉三縣。尋以疾致仕。五年正月。因新陞總督未至。仍以原銜遣官奏捷。疏言僞宜春王朱議行。率衆從江西入據汀州山寨。總兵官于永紱破其寨。議行就擒。奏入。

世祖命誅之。二月。分遣官兵。恢復連城順昌將樂三縣。

先後擒斬僞侍郎趙士冕。僞總兵黃鍾靈等。六年八月。仍起用存仁爲兵部尙書。兼都察院右副都御史。總督直隸山東河南。時榆園巨寇爲害大名。存仁知歸德侯方域有才名。致書往咨其策。方域條列以復。遂用其計平賊。七年。

世祖詔令督撫按臣考校守令文藝。有不諳者調用。存仁躬涖各郡。命題考試。等第公明。居官廉幹者。有一二語通曉。卽注上等。否則文雖佳。亦乙之。監司請其故。存仁曰。我武臣也。

朝廷命我校文。我第考實。文有僞。實難欺也。况守令多從龍彥。未嘗教之。遽試短長。恐灰能吏心。衆服其識大體。是年及九年三遇。

恩詔。加世職至一等精奇尼哈番。兼一拖沙喇哈番。世襲罔替。未幾卒於官。贈太子太保。廕子一人。入監讀書。

予祭葬。諡忠勤。崇祀直隸山東河南浙江福建五省名宦。康熙二十三年。

聖祖仁皇帝召八旗漢軍都統副都統侍郎等官。諭曰。國家自

祖宗定鼎以來。委任漢軍官員。與滿洲一體。其中頗有宣猷効力。如孟喬芳張存仁輩。朝廷亦得其用。蓋聖心眷注。始終不替云。瑞午。張存仁弟存義之子。順治十二年。以

恩廕授河南磁州知州。十六年。陞江南池州府知府。坐事調山東沂州知州。尋丁憂解任。服闋。補直隸

易州知州。康熙九年。陞浙江杭州府知府。十一年。遷福建邵武府知府。輕徭恤獄。禮士愛民。郡人賴焉。十三年。逆藩耿精忠反。分遣逆檄。徇下各郡縣。瑞午誓死不從。賊將執之。瑞午罵賊不屈死。子玘。瑛。珍。玳。瑜。媳婦王氏。李氏。俱隨任。同日遇難。賊平。督撫以其事聞。贈太僕寺卿。

予祭葬。廕子一人入監讀書。

賜之勅曰。鞠躬盡瘁。人臣奉職之猷。酬德褒庸。朝廷勸忠之典。蓋靖共既。昭其大。則褒榮必厚。厥終爾原。任

福建邵武府知府。性行忠良。才猷練達。身膺民社。服勞無忝。於在官職。任封疆。死綏不忘。夫報主當妖氛之跋扈。抗大節而捐軀。宜沛愍綸。兼優寵秩。茲贈爾太僕寺卿。於戲。位崇百執。弘敷紫誥之華。寵沃九原。永作黃墟之賁。幽靈不昧。鉅典式承。璫張存仁孫。初襲佐領。康熙十七年。隨征福建。六月。偽將軍劉國軒等。率逆賊萬餘。來犯海澄縣。璫力戰陣亡。尋議卹。贈拖沙喇哈番。

巴泰。漢軍鑲藍旗人。本姓金。天聰二年。選

御前承值。旋任二等轄。五年。大兵攻大凌河。巴泰隨

太宗文皇帝親擊錦州敵兵。追至步兵營。尼爾漢轄中傷墜馬。巴泰越衆馳入。援之以出。六年。從征大同。往疙疸坨捉生。遇席特庫等爲敵追射甚急。卽同洪科突入敵陣。擊敗之。又同席特庫捉生。斬一人。崇德元年。隨睿親王多爾袞征明。巴泰往擒敵哨。在沙河生擒哨騎一人。斬九人。獲馬八匹。遇我兵於楊村探敵。爲敵所射。巴泰助戰。陣斬一人。師旋至邊。率十人往偵三屯營形勢。路遇敵七人。奪達爾虎馬匹遁去。巴泰急追。盡殺之。仍奪其馬。七年。隨鄭親王濟爾哈朗攻錦

州外城。同宜爾登擊敗明軍門。洪承疇兵。比還殿後。猝有敵十人來襲。巴泰面中流矢。仍縱馬直入。手刃一人。敵乃却。六年。嘉其善戰。併錄前勞。授半個前程。世職。尋陞一等轄。順治元年。定鼎燕京。二年。追敘舊臣勞績。以巴泰係

太宗恩養轄員。加世職爲牛彖章京。七年。遇

恩詔。加一拖沙喇哈番。尋以不附睿王多爾袞革職。併革一拖沙喇哈番。繫獄。巴泰終不附從。是年。睿王多爾袞薨。事漸白。八年二月。

世祖章皇帝特恩復原職。九年。兩遇

八旗通志 卷一百八十四
恩詔。加世職至二等阿達哈哈番。尋擢包衣昂邦。十五年授蘇喇昂邦。康熙三年。

聖祖仁皇帝追念其不附睿王多爾袞。優加三等阿思哈尼哈番世職。六月。陞內國史院大學士。六年九月。充纂修

世祖實錄總裁官。七年二月。以疾致仕。八年五月。復起為秘書院大學士。六月。充

實錄監修總裁官。尋屢疏乞休。俱

溫旨慰留之。十月。改內三院大學士為殿閣銜。以巴泰為中和殿大學士兼吏部尚書。十一月。以巴泰

當

太宗

世祖時。卽用為親近侍衛之臣。累事

三朝。勤勞懋著。特加世職至一等精奇尼哈番。十一年。

世祖實錄告成。議敘。加太子太傅。十二年三月。再以原官致仕。十四年三月。

詔仍以原銜入閣辦事。十六年七月。引年乞休。得

旨。卿以年邁請休。情詞懇切。准原官致仕。以遂爾志。念爾効力有年。清端勤慎。將朕所御衣冠帶靴。特賜與

爾用旌老臣。以昭朕始終眷念至意。十九年八月。復起用爲正黃旗漢軍都統。二十三年。因年老。以內大臣銜。同原品致仕。食俸大臣上朝。尋卒。

予祭葬。諡文恪。勒石於墓。以紀勲焉。文曰。朕惟國家獎勵臣工。弘敷惠卹。其有循分恪勤之臣。逮事累朝。歷有年所。則褒榮之典。亦宜沛焉。爾巴泰策名早歲。躬遇昌期。初奮迹於行間。曾効馳驅之力。繼趨承於禁近。每昭宿衛之勞。遂陟綸扉。與叅密勿。復膺任使。分典戎麾。爾則奉職維勤。持身克慎。因服

官之有素。用延世以推恩。逮引年致政。以來。正頤養優游之日。遽聞徂謝。用切軫懷。命考彝章。諡曰文恪。於戲。生旣累膺崇秩。歿更永錫令名。爰勒貞珉。樹之墓道。以垂休於奕世云。巴泰謹慎無過。謝政復起。

本朝三八閣者。巴泰而外。不概見焉。先是巴泰隸正黃旗包衣佐領下。後以巴泰功。奉

聖祖諭。編設佐領。移隸鑲藍旗漢軍。巴喀。巴泰之弟。初爲壯尼大。尋管牛彖事。累陞至一等侍衛。康熙十四年。從征逆藩耿精忠。至福建。於諸暨縣擊賊。僞將軍王忠仁等敗之。敗僞都督龔姓兵於

義烏縣。又敗偽都督周烈兵於洪橋。至衢州府屬之蕉園地方。有偽總兵桑明。同偽都督周烈合兵來戰。並奮擊敗之。又連敗偽總兵葉年。偽將軍馬九玉等。逆藩耿精忠。率眾於大溪灘。拒木城以戰。巴喀隨官兵進擊。大敗賊眾。尋恢復建陽縣城。又進擊海賊鄭錦。偽總督徐堯兵。又分擊偽總督興明伯等兵。俱在事有功。尋議敘。授拜他喇布勒哈番。

劉光弼。漢軍鑲藍旗人。初任耀州河屯大。尋擢甲喇章京。天聰二年圍錦州。隨四固山以紅衣

礮攻南壯軍臺。克之。又同三等梅勒章京墨爾根。擊敗松山杏山馬步兵。又協我左翼兵。進擊錦州敵兵。敗之。五年攻大凌河。督放本甲喇紅衣礮。攻克于子章。纏星泡。馬家湖等三臺。大凌河城內兵突出來戰。光弼越眾先入。斬一人。並援出金礮甲喇下孫遇。又擊明監軍道張春兵。陣斬一人。崇德五年。大兵圍錦州。隨墨爾根。擊攻克呂洪山臺。六年圍錦州。擊敗山口步兵。又隨四固山以紅衣礮攻克塔山附近臺。及塔山城。隨進攻杏山附近臺。並拔其城。七年敘功。

授牛彖章京世職。尋陞梅勒章京。八年。隨大兵征前屯衛。中後所二城。督放本固山紅衣礮有功。順治元年。加半個前程。世職。五年。陞禮部侍郎。彖署理江西提督事務。六年七月。平復廣昌縣山賊。收饒州撫州降將三十餘名。八月。實授都督同知。江西提督總兵官。十二月。山賊張司盛。洪國玉等。盤踞湖東。光弼遣中軍叅將陳陞等往剿。追至大徑竹地方。敗之。餘賊奔潰。偽總兵董明魁。郭承旻等率眾降。江右土寇悉平。七年。九年。三遇。

恩詔。加世職至一等阿達哈哈番。十三年正月。世祖章皇帝以光弼等十九員。力捍巖疆。著有勞績。特賜鞍馬弓矢。撒袋等物。十六年。以老病致仕。尋卒。予祭葬如典禮。

段應舉。漢軍鑲藍旗人。父思信。仕明為廣寧千總。我師取廣寧時。投誠。授牛彖章京世職。卒。應舉襲職。順治五年。隨大兵出征山西。攻汾州府關廂。及太谷縣。俱用紅衣礮克之。六年。任戶部理事官。七年。擢甲喇章京。是年。及九年。三遇恩詔。加世職至二等阿達哈哈番。十年。隨定遠大將軍

貝勒屯齊往征湖南。逆賊孫可望拒敵於全路口。應舉同夸蘭大高鳴鐘等奮擊有功。又正黃正紅兩旗兵為賊所困。應舉率兵出援。擊敗賊眾。十七年。陞梅勒章京。駐防廣東。時賊渠蘇利遣偽總兵陳延洪。率賊出靖海所拒戰。應舉率本翼官兵奮擊敗之。又敗偽總兵陳義兵千餘於龍江寺河岸。賊復遣偽總兵鄭勝。率眾千餘來戰。應舉進擊。斬刈殆盡。康熙六年。敘其績。加世職為一等阿達哈哈番。八年。自廣東撤回。為本旗副都統。十二年。署理山東提督。十三年。六

月奉

聖祖仁皇帝命。撥京口將軍標下官兵三千。江南提標

官兵二千。率赴杭州。聽將軍賴哈達節制。尋為隨征福建提督。七月。應舉疏報。縉雲地方。通金華處州兩府。為糧道要途。逆黨蕭君球率賊侵犯。隨征總兵官劉顯芳。遣發官兵進剿。於黃烏嶺攻破木城。屢敗賊眾。斬獲甚多。十二月。招撫偽將軍馬升。十六年九月。生擒偽將軍李復貴。偽軍師林日向等。十二月。海賊五千餘人。圍泉州府小營地方。應舉同副都統楊鳳翔領兵往

援擒僞副總兵黃忠等百餘人。水陸並進。殺賊三千餘人。十七年二月。海運僞水師總督林英等犯泉州府界。應舉遣標下叅將朱起龍等率兵撲剿。大敗之於白湖等處。生擒僞總兵林耀。僞副將黃洪等。斬之。五月。以應舉久任封疆。地方未見寧謐。解提督任。未幾。海逆復犯漳州府。應舉親率將士往援。戰失利。退守海澄縣。賊兵雲集。六月。攻陷縣城。應舉同副都統二等伯穆和林並自經。閩人哀之。崇祀名宦祠。子牧臣承襲世職。

高鳴鐘。漢軍鑲藍旗人。初任牛录章京。崇德三年。隨揚威大將軍貝勒岳託。證明。遇王副將兵。擊敗之。又步戰。敗王叅將兵於牆子嶺。八年。從鄭親王濟爾哈朗。攻明前屯衛。中後所二城。督放本甲喇紅衣礮有功。順治元年。議敘。授半個前程世職。六月。隨固山額真墨爾根。轄往平山西。攻太原府城。用紅衣礮克之。復擊敗流賊毛總兵。三年。從征湖廣。同蘇朗敗賊許總兵。馬步兵一千四百。又同滿錦敗賊兵一萬四千餘。五年。從征大同。叛鎮姜瓖。敗賊僞辛總兵。馬步兵

二千。又以紅衣礮攻克渾源州。左衛朔州。太谷縣四城。七年遇

恩詔。加授拜他喇布勒哈番。尋敘功。加一拖沙喇哈番。九年二次遇

恩詔。加至二等阿達哈哈番。仕至江南提督。自經死。子永運襲職。康熙十三年。從征逆藩吳三桂。至湖廣。有僞將軍陶繼智。劉之復。總兵張權元等。率賊兵萬餘。乘船三百餘艘。自宜都縣來犯彝陵。永運隨大兵水戰。敗之。至長沙。逆賊吳國桂等。率兵萬餘。列陣拒敵。永運奮勇衝擊。歿於陣。二十五年。議卹。加贈世職。爲一等阿達哈哈番。

八旗通志初集卷之一百八十五
名臣列傳四十五

鑲黃旗滿洲得諡大臣

阿祿哈

米思翰

馬思喀

馬武

佟國維

殷德

阿爾迪

蘇爾達

海清

德明

正黃旗滿洲得諡大臣

愛星阿

俄忒渾

卷之四